

摘藻堂四庫全書薈要

集部

欽定四庫全書薈要

集部

元詩選初集卷五十



詳校官候選知縣臣吳甸華

欽定四庫全書薈要卷二萬四百十

集部

元詩選初集卷五十

長洲 顧嗣立

編

陳高不繫舟漁集



高字子上溫州平陽人登至正十四年進士第授
慶元路錄事未三年輒自免去方氏至欲招致之
不可得再授慈谿縣尹亦不起平陽陷棄妻子往
來閩浙間二十六年春浮海過山東謁河南王庫
庫特穆爾于懷慶密論江南虛實庫庫喜欲官之

居數月疾作卒年五十有三子上別號不繫舟漁者自舉子時其所作已為流輩推重金華胡仲申以古學名少所許可獨稱子上曰能及至京師翰林歐陽原功太常張仲舉禮部貢泰甫助教程以文皆相與論薦之度時不可為棄官奔走南北卒以自全明初睢山蘇伯衡訪其詩文得若干首詮次成帙題曰子上存藁八世孫一元重校而刻之

埽室

日日埽居室既埽塵復生性癖頗愛淨去塵心乃清居
閒雖少事處世豈無營弱子在襁褓幾時堪使令蹉跎
嘆光景困守限戶庭非無四方志邊隅未休兵遙聞官
軍出盡毀徐州城朱門與碧牖回首成榛荆江淮及閩
越寇盜之所經人民苟全活奔走不得寧睽茲蓬廬下
棲遲聊慰情但當勤洒埽讀書飽藜羹萬事委天運何
必求榮名

晚歸

西崦日初沒，遠樹生夕陰。
晚步草露濕，獨歸松徑深。
入室載言笑，稚子牽衣襟。
尊中有濁醪，可以酌復斟。
坐來窻牖白，佳月出東林。
幽情寄觴詠，適意忘華簪。
自得閒居理，寧憂外患侵。

遷居

遷居城南村，幽情意所適。
室廬頗虛敞，結構自疇昔。
倒檜護周垣，修竹蔭竒石。
涓涓井泉清，靄靄簷雲白。
去郭二三里，迴與囂塵隔。
于茲載寢興，朝莫靡所迫。
讀書南

窗下奉食老親側褰裾戲童稚煮茗待賓客身閒貧亦
佳機忘心已寂旋種園中蔬春葉庶堪摘時危幸安處
生理寧復識雖非曠達夫翫世聊自得

泊館頭步

朝發芳林嶺夜依館頭泊厭茲跋涉勞懷哉田園樂生
理苦艱難歸耕嘆悠邈貧窶何足憂甘旨焉所託棲棲
道路中素心負丘壑行年三十餘齒牙半搖落良由筋
骨疲豈但質衰弱憂思耿不寐起觀衆星白羣雞鳴江

皋已復戒行客

歲首自廣陵入高郵舟中作

北風吹湖水遠行當歲徂孤舟無同人相依唯僕夫遙
睇高郵城彷彿十里餘落日去地遠飛鴈與雲俱悠悠
思故鄉邈在天南隅慈親倚門望我身猶道途羈旅豈
足恤但念骨肉疎何當脫行路歸臥山中廬

近山軒燕集

并序

至正十二年夏四月八日會于張思誠之近山軒

時孔君正夫方自吳回曾伯大陳德華徐德顯金
士名呂敬中盧文威鄭子敬咸在而高亦與焉皆
能文之士酒酣正夫言曰茲集也不可以無紀乃
命賦詩分韻取陶淵明益夏草木長繞屋樹扶疎
之句凡為詩十首烏乎朋友會合而歡宴詠歌亦
古人之所重也然平居無事時而接杯觴弄筆墨
此特文人才士之常耳當茲海內用武之日而吾
與諸君居左邑下州得以恬然安處相與飲酒賦

詩為樂豈非幸歟夫樂而不知其樂者衆人之情也樂焉而不以文者荒于樂者也今也樂其樂而必以文亦可謂不失其正矣敘而錄之所以不忘也

幽軒近青山層簷蔭高木茲晨天氣佳涼雨破裨燠鳴蟬度新聲叢蕙散餘馥几席具陳列籩豆進殽菽故人吳中歸舉酒喜相屬微酣各忘形起坐命碁局好樂初匪荒笑語勝絲竹人生百年內光景猶轉轂況當艱虞

際歡會情愈篤酒闌復何言長歌紫芝曲

過馮公嶺

絕壁倚霄漢千峰勢如馳何年五丁士鑿石連天梯
縈紆不可上髣髴登峨眉白石齧我足霜風吹我衣前途
政迢遞我已筋力疲寒花道傍開幽鳥林間啼彷徨俯
自慰少憩日已西浮生浪奔走困踣胡爾為他年履坦
道慎勿忘嶮巖

感興七首

唐虞邈以遠禹湯亦悠悠周轍一東狩王綱遂漂流春秋更五霸日日尋戈矛陵夷逮七國斯民益無聊戰血滿溝塹殺星入雲霄商君佐嬴秦變法開田疇積強至六世虎視吞諸侯宰割天下地郡縣羅九州焚香任法律儒士咸虔劉漢皇起豐沛三尺誅民讐開基四百年烈烈壯鴻猷惜哉英明主不學遺遠謀一時儻狗徒贊業非伊周遂使皇王政廢墮不復修此機一以失餘恨空千秋

青山或可移白石尚可轉志士懷苦心九死不願返首
陽餓仁賢至今激貪悞汨羅沈楚纍千載悲忠蹇人生
誰不死身沒名貴顯胡為草玄人美新思苟免

豪家列華第被金飯珠玉茅屋耕田夫衣食常不足均
為羲皇民胡為異榮辱遠懷雍熙世寧復有茲俗誰與
開井田吾思食其肉

縹緲浮圖宮儼若王者居列徒二三千僮僕數百餘飽
食被紈素安坐談空虛秋來入租稅鞭朴耕田夫不恤

終歲苦徵求盡錙銖野人不敢怒泣涕長歔歔

客從北方來少年美容顏繡衣白玉帶駿馬黃金鞍捧
鞭揖豪右意氣輕丘山自云金張胄祖父皆朱璠不用
識文字二十為高官市人共咨嗟夾道紛駢觀如何窮
巷士埋首書卷間年年去射策臨老猶儒冠

步出城門道忽見羣馳車車中何所有文貝光陸離美
娃載後乘銷金燦裳衣問之何如人云是官滿歸聞者
交嘆息清名復奚為

悲風西北來，樹木聲蕭蕭。
蟋蟀鳴四壁，鴻鴈飛層霄。
時光忽已異，四序如更徂。
人生無百年，轉矚朱顏凋。
胡不崇明德，早使勛業昭。
空悲千載下，身死名寂寥。

送陸有章分題得弇山

弇山如層臺，積翠俯城郭。
古木秀松楸，玄鳥隱樓閣。
雨散飛素雲，風靜語丹鶴。
游人日躋攀，杖屨相繹絡。
陸郎吳中來，雅志好丘壑。
哦詩松間題，攜酒石上酌。
我性亦愛山，方期結幽約。
茲焉送子去，登陟慘不樂。
遠別已傷

懷真境況寥落佇立睇大江孤舟入冥邈

留別諸友分韻得日字

寒色滿大江北風吹落日停舟別諸彥中懷抱湮鬱黃
緣結金蘭深固比膠漆佳會不可常歲宴政寥慄居者
成淹留行者念家室分攜在俄頃東西永相失俯視流
波去仰看飛鳥疾人生如浮萍乾坤渺蕭瑟

青田山房為劉養愚賦

幽幽青田山積翠高千尋大溪經其南白雲在山陰下

有隱者居卜築邃以深開門面石壁結構依松林牆古
薜荔長砌間苔蘚侵簷間戲馴鹿戶外鳴幽禽花卉春
佳治竹木夏蕭森秋宵月照牖冬晨雪明岑塵坱詎能
到車馬絕過臨其中何所有乃有書與琴逍遙足忘世
俯仰可娛心酒熟聊自醉興來時獨吟永謝城市喧何
用懷纓簪

征婦怨

征夫出門時征婦淚垂垂把酒勸夫飲執手問歸期歸

期今已過更無消息歸朝朝倚樓望只見鴈南飛

落梅曲

梅花開滿枝無奈曉風吹風吹花落盡爭侶未開時花
開終有落非關曉風惡愁殺愛花人城頭復吹角

商婦吟

嫁夫嫁商賈重利不重恩三年南海去寄信無回言妾
身為婦人不敢出閨門縫衣待君返請君看淚痕

懲愆

生晚構屯蹇性直離禍尤祿仕以為養反貽父母憂一
身被茲累懲愆豈無由末才任冗職奔走內恆羞斯民
困瘡痂鞭撻忍誅求緩刑志撫字厲節懷清修獨醒衆
所忌讒構生戈矛竄然空屋中經月成淹留潛棲絕內
外孤坐自吟謳朝看白日出夜觀明星流西風木葉下
四壁蛩聲愁感茲時物變蕭條悲素秋念昔賢與哲艱
危尚拘幽夏臺曾困湯美里乃縻周屈平忠見放楊肸
賢而囚縲綫苟非罪于人吾何讎知幾昧前訓省躬思

遠猷安得委天運吾道方悠悠

發嶧縣

行役苦晝熱戒程當夜闌睡覺呼僕夫出門路漫漫明月照人影疎星挂樹間流螢點衣袂零露溼巾冠朝遠剡溪水俄入新昌山屬茲干戈際愈覺行路難愧無經世資何以濟險艱悒悒抱遠思綿綿起憂端東方忽已白林鳥鳴間關前瞻石嶺峻喟然發長嘆

過廣福寺石屏山房懷曾子白修撰陳伯清侍

講

游行滯春雨憩息依禪林寺門閉寥闕崖石聳嶽崙幽
禽飛復止脩竹何森森賞寂屏塵慮觀空起遐心分榻
坐雲影巡廊步晚陰緬懷玉堂彥曾此共登臨惆悵撫
遺迹石徑蒼苔深

觀湖

勝日攜佳友出郊眺長湖積波何微茫巨浪爭奔趨隱
耳驚萬雷喧空撼千夫上下宇宙混東西垠堦無晶淼

浸百里彷彿吞三吳坤輿圻不合鰲極傾莫扶晶光浴
秋日簸弄琉璃珠蜿蜒吳中山黛色青糝糊夫椒據其
左林屋在南隅風前漁舸並煙際歸帆孤幽浦出菱芡
淺渚生葭蘆濯濯見白鳥汎汎浮青鳧雙眸勞應接宿
醒為之蘇倚樹興不淺哦詩神欲徂念昔天地闢水府
開玄都禹功定震澤周官書具區于今幾千載灌浸無
時枯吳越爭戰地廢興等檇蒲嗟我與諸君勝覽得自
娛不須感今古臨風且傾壺

種槿花

炎方有槿樹衣被代蠶桑舍西得閒園種之漫成行苗
生初夏時料理晨夕忙揮鋤向烈日灑汗成流漿培根
澆灌頻高者三尺強鮮鮮綠葉茂燦燦金英黃結實吐
秋繭皎潔如雪霜及時以收斂采采動盈筐緝治入機
杼裁剪為衣裳禦寒類挾纊老稚免淒涼豪家植花卉
紛紛被垣牆于世竟何補爭先翫芬芳棄取何相異感
物增惋傷

山中讀書圖

遠山如藍近山綠前門蒼松後門竹幽人讀書棲石根
有客拏舟訪溪曲白雲冉冉落虛窗清風泠泠散飛瀑
林泉深處隔紅塵便欲相依結茅屋

題太白納涼圖

六月炎天飛火烏土焦石爍河流枯邇來衰病更畏熱
呼叫欲狂揮汗珠飲冰嚼藕廢朝夕小室如爐眠不得
閒將圖畫縣四壁漫想山中好泉石就中此圖尤絕奇

青林飛瀑吹涼颺何人展席坐蒼蘚乃是謫仙初醉時
露頂裸裎投羽扇仰看雲生白成練松陰如雨毛骨寒
豈識人間裨促倦祇今匡廬道阻修鴈蕩天台近可游
便欲致身丘壑裏挂巾石壁繼風流

啄木鳥

啄木鳥啄樹枝頭紅如血口如錐終日啄木長苦飢木
心有蟲不肯啄天生爾禽復何為吁嗟乎啄木鳥佳木
蠹盡知不知

促織鳴

促織鳴鳴唧唧懶婦不驚客心悽惻秋夜月明露如雨
西風吹涼透締苧懶婦無裳終懶織遠客衣單恨砧杵
促織促織無復悲鳴客心良苦懶婦不驚

白頭吟

試聽白頭吟慢飲尊中酒古來悲白頭人情苦難久結
髮為夫妻百年期白首容顏衰落相棄捐何況君臣與
朋友漢高寬大主蕭何開國功讒言一以入幾死天獄

中陳餘與張耳刎頸同生死一朝爭相印讎怨世無比
周文呂望不再見管鮑結交寧復聞玄德孔明若魚水
膠漆孰如雷與陳斯人自此一以少今世求之更無有
談笑尋戈矛那能託身後聽我歌歌白頭勸君飲君莫
愁日月有時而剝蝕世態誰能終不易

折楊柳

折楊柳送別離朝朝送人遠別離門前楊柳折還稀今
年折楊柳來歲復生枝奈何別離子一去無回時

食蓮詞寄同年諸公

曉食盤中蓮忽思水中藕蓮苦如茶藕甘能爽口甘
苦雖不同同生泥水中得藕薦邊實采蓮歸藥籠奈何
蓮有韻貴人終不食藕絲雖長難繫蓮蓮抱苦心空自
憐

懷友

作客黃山下思君漢水濱愁牽清夜夢吟瘦老夫身漂
泊誰知我交游獨此人春來尋小艇江上問通津

夜半舟發丹陽

舟子貪風順開帆
半夜行天寒四野靜
水白大星明長
缺歸何日浮萍笑
此生柁樓眠不穩
起坐待雞鳴

城西虎跑寺

石勢虎蹲伏山形龍屈盤
寺開唐殿閣墳掩宋衣冠
幽澗泉聲細斜陽塔影寒
近城多戰鼓棲息此中安

贈章以元昆仲

相見談經史江樓坐夜闌
風聲吹屋響燈影照人寒
俗

薄交游盡時危出處難衰年逢二妙亦得悶懷寬

病中遣懷二首

臥病玄冬半羈棲碧海邊風塵方滿野戎馬已經年下
邑供軍食何時發漕船薄才無寸補自合賦歸田
生理居官廢空聞祿代耕僕嫌裘褐敝妻笑甌塵生欲
去乾坤窄無成歲月更故人清要地應解樹勛名

入山

入山驚道險上嶺覺天低日礙危峰過雲依翠壁棲幽

花如血染怪鳥學兒啼避世須來此桃源路已迷

新歲憶曾子白

經月愁聞雨新年苦憶君青華為客久白髮著書勤酒
共隣僧飲蔬從野老分何時共登眺整屐待晴雲

重登近山樓

羈旅歸來日危樓得再登山如前歲好雲向小窗凝種
朮看今長藏書比舊增題詩成感慨老我愧何能

丁酉歲述懷一百韻

屯蹇悲吾道蕭條客異鄉
謀疎多迂俗性直遂逢殃
鷲鳥纏羅網翹材受斧斨
世無知己者誰識此心臧
悵望天同遠憂來水共長
百年千變態一日九迴腸
憶昔年華壯居貧學業荒
讀書慚老大操筆欲顛僵
發憤光陰逝研思寢食忘
雨天燈火夜冬曉鬢毛霜
書字蠅頭綴歌詩玉韻鏘
心懷冰蘖苦佩結茝蘭芳
兔笑株傍守蛙憐井底藏
拂衣迷道路仗劔遠游方
景趣多佳麗江湖信渺茫
吳甌秋浪白淮楚莫雲黃
野寺金鋪屋樓船錦

繫檣臺荒廩引子丘暝虎成行瞻眺窮幽勝交游得俊
良跡雖萍梗泛名藉藻詞揚古道槐花發清秋桂子香
梯高雲路迴殿廣月華涼追逐英髦後躋攀翰墨場偶
然收鄙野亦得步康莊上國春光早明時帝運昌皇居
城萬雉禁苑柳千章對策披閭闔陳忠補袞裳臚傳天
咫尺鵬化海汪洋玉陛聯班序瓊林被寵光花簪紅映
帽酒賜綠浮觴草色沾零露葵心映太陽委身從此始
憂國未渠央造化功深厚雲霄志激昂初非縻好爵亦

足慰高堂奉命為民牧宣威到海旁鄖鄉傳載籍藩閩
重金湯江抱孤城轉山含遠樹蒼天高連太白日出上
扶桑土俗何多訟編氓半是商由來難撫字況復際劬
勦早出星當戶宵廻月滿牆勤勞非敢憚倚仗最難量
僧舍屯戈甲田家出糗糧但聞施箠楚不顧之糟糠南
北脩途梗滄溟巨艦航貴人紛往返終歲費迎將分省
官曹盛行臺紀律張聯翩驄馬至絡繹使車煌孰問瘡
痍苦惟耽燕樂搶幽花籠綺席踈柳媚紅妝下筓萬錢

費揮金一笑償珍珠兼水陸容冶陋姬姜風靡瞻儀表
波頹缺禮防近人跳鼠獺當道舞豺狼爭詫堆金塢寧
聞返象牀紛紛慕羶蟻袞袞轉九蜚讒搆蠅棲棘吞圖
雀捕蝗負荆廉藺遠刎頸耳餘猖清白甘飢餓輕肥恣
陸梁滑稽吾獨拙杓鑿衆胥戕鯨困遭螻蟻鴟翔逐鳳
皇無聊悵悵欲去瞽偃偃公冶羈縻魯靈均放逐湘
一身奚足恤萬事總堪傷粵自羣兇起于今七載強釁
端萌汝頴滋蔓匝荆襄處處蜂屯盛時時豕突狂食人

肝作脯掠野犬驅犴霧駭車塵暗雷轟礮石磅絳巾明
燭火白骨積崇岡天狗昏騰喙攬搶曉吐芒黍田荒出
草蒿樹大如楊天府惟吳會王州說建康粟儲供海漕
柏列凜臺網陷沒俄相繼分崩遂莫當重臣誰抗節方
伯罕勤王將帥推門闕謀謨出廟廊捷音空陸續賊勢
愈跳踉夜靜吹笳急霜寒擊鼓鏜徒羹黔首肉詎斧赤
眉吭險歎連城失全憐壯士亡關河天漠漠江漢水湯
湯海卒乘文鷁苗軍跨驕驕立功期克復畜銳尚彷徨

疾養終成痼醫招不療瘍民生遂塗炭泉冽浸苞稂厄
運丁陽九何時見一匡淳龐懷吳頊揖讓想虞唐俯仰
窮今昔謳吟發慨慷乾坤旋磨古歲月逝波忙露白寒
蛩泣秋高客鴈翔盛時愁易集遯世困何妨駿足悲槽
檻珍禽謝稻梁塞翁徒失馬臧穀總亡羊脫略千鈞重
消磨百鍊剛悶憑詩暫遣病倚藥頻嘗閒散思投紱韜
潛貴括囊陶公能委運梅尉早知彰故土多薇蕨春江
有鯉魴歸歟理蓑笠從此釣滄浪

同諸友游宴豐山并序

至正戊子春正月七日甲辰永嘉陳高與黃巖商
尚敬施謙訪朱君伯賢于臨海之鳳嶼越翼日乙
巳伯賢與其季伯良持酒俎邀予登豐山時黃君
順德章君子皓陳君大章欣然從游已而陳師聖
張子材偕弟子溫亦至遂相與上絕頂望巨海還
飲浮圖寺席既撤復舉盞松樹間酒酣因賦二十

八韻

新歲多幽興清游出縣城故人畱款曲好友復逢迎整
屐當清曉登山寄遠情嵐光寒不起樹色寂無聲徙倚
巖邊憩逶迤谷底行路蹊窮屈折峰頂上崢嶸俯瞰滄
溟濶渾疑地軸傾天光連浩淼海氣變陰晴沙鳥雙雙
白風帆葉葉輕波瀾看浩蕩島嶼見分明宇宙真無極
虛浮嘆此生侶堪扳若木可擬即蓬瀛眺望移時立稽
留半日程那知身是客但覺思逾清古寺藏深竹禪窗
陰白檉倦依林樾坐靜聽鼓鐘鳴高論窮千古彈碁謾

一枰旋呼茶滿椀
賸出酒盈甕
珍重開華席
頻煩勸兒
觥嘉蔬烹筍
韭異味雜螺
蛭浩飲俱
勅敵沈酣
及老成
狂吟驚虎豹
至樂謝筭
笙忽返青
林興其如
白日征扶
攜重舉盞
眞率遂班
荆自笑何
為者空傳
漫浪名梗
萍
慚獨客冠
蓋動羣英
勝賞洵堪
紀高懷孰
與并明朝
歸
北郭回首
暮雲平

客黃山

自到黃山十餘日
終日飽飯只昏昏
誰家搗練不停杵

俗吏抱書長在門天寒鴻鴈滿南國歲晚梅花開故園
客裏謾將詩慰藉遣懷不用酒盈樽

送鄭汝玉歸莆關

莆關深入海東南日出先看曙色酣李愿歸耕盤谷土
杜陵思樂百花潭到家三月山礬白八饌千林竹筍甘
愧我天涯尚羈旅鄉愁因爾不能堪

落日

秋郊慘淡落日微西風蕭蕭吹客衣殘霞紅葉自相映

獨鶴孤鴻何處歸
中州塵暗鼓鼙急
滄海浪高舟楫稀
回首東山月未上
怪看星影弄輝輝

三月十三日錢成夫壽旦諸公會飲城南文秀

園

城南園館小橋東
柳樹青青花樹紅
此日杯盤追勝事
一時冠蓋集羣公
美姬舞罷歌金縷
醉客歸遲並玉驄
莫遣春光空老去
明朝歡會更須同

羈思十首次謝純然韻

錄四

霜風吹帽髮全枯多病兼愁懶步趨身寄他鄉年又盡
吟看衰草日將晡故園消息沈天表舊日交游隔海隅
祇有濁醪堪遣興擬從鄰舍典羅襦

夜中見月渾忘寐曉起看山祇獨吟那得文章垂不朽
已知衰老故相侵天寒大澤龍蛇蟄歲晚荒郊雨雪深
有客可人吾邑子往來時得一開襟

淮西盜賊成羣起攻奪城池殺害多保障誰能為尹鐸
折衝未見有廉頗南來羽檄時時急北向官軍日日過

賈誼治安空有策九重深遠欲如何

落木飛鴻冬月莫短衣烏帽五湖濱
思親夜夜生歸夢作客年年笑此身
犬吠競猜南越雪鸞啼未聽上林春
世間誰是知音者青眼相看只故人

寄顧仲明教授

長憶青華翠色寒北窗對酒幾同看
鼎煎浦口鱖魚白盤簇簷頭樹果丹
來往正期娛晚景亂離俄嘆失清歡
故鄉回首江山異落日閩南獨倚闌

謝戴文瓚僉院惠草帽

細結夫須染色新使君持贈意偏真玉川便易煎茶帽
元亮還拋漉酒巾影墮水波浮晚照黑遮霜鬢隔秋塵
深慚欲報無瓊玖感戴寧忘拂拭頻

游靈山寺

舊聞海上有神山今見樓臺島嶼間鰲背千年開佛國
鯨波十里隔人寰風吹僧影浮杯渡雲送龍身聽法還
避世擬從支遁隱塵簪吾已久投閒

寓鹿城東山下

大隱從來居市城幽棲借得草堂清
鳥啼花雨疎疎落
鹿臥巖雲細細生
石眼汲泉煎翠茗
竹根鋤土種黃精
艱危隨處安生理
何必青門學邵平

冬日夜夢中得句因續成之

今日冬至陽始回
客中無賴廢持杯
乾坤萬里風塵滿
南北何時道路開
白髮頻添隨繡線
壯心都冷類葭灰
中興早看雲臺築
老去何妨臥草萊

客南塘作二首

春來日日起西風吹送浮雲過海東
花落名園荒草滿燕歸華屋故巢空
陶潛解印閒居久王粲登樓作賦工
舊日交游多白首時時相見慰途窮

江頭無計問歸舟抱病羈棲古寺幽
風雨鶯花成寂寞干戈詩酒廢賡酬
衰年白日愁邊度故國青山夢裏游
見說王師向淮甸早須傳檄定南州

思親詞

淚滴東甌水思親欲見難
水流終有盡兒淚幾時乾

送興童都事還京

日照離筵酒風吹去客舟
不如東海水相送到神州

題畫二首

茅舍雪初消幽窗夜方靜
美人期不來月照梅花影
愁來生白髮問爾復何愁
應被春光惱多情雪滿頭

題子昂折枝竹

帝子啼痕濕湘江莫雨寒
絕憐樵采後畱得一枝看

絕句二首

地濕泉流礎庭虛石臥雲井闌行小蟻蛛網挂飛蚊
雲合虹腰斷風回雨脚斜淺灘屯宿鷺高樹競棲鴉

紅葉

片片染秋霜枝枝映夕陽縱饒紅勝錦只是惱愁腸

禽名詩

游子歸心切提壺看落紅告天天不語愁殺白頭翁

藥名詩

丈夫懷遠志兒女苦參商
過海防風浪何當歸故鄉

題菘菜圖

栗里園荒舊日歸
手栽菘菜雨根肥
只今客裏看圖畫
惆悵紅塵滿目飛

題花竹翎毛二首

梨花沐雨帶嬌羞
獨立枝間一鳥幽
若遣美人初睡起
定應無處著春愁

乾坤寥落歲將闌
竹葉梅花獨好看
可惜幽禽棲不穩

霜風日暮羽毛寒

即事漫題五首

年年花發可憐春
今年見花愁殺人
不是風光近來別
祇緣兵戰此時頻

老翁憶子哭聲哀
婦怨征夫去不回
前日山中新戰死
昨宵夢裏見歸來

悍吏登門橫索錢
人家供給正憂煎
官糧預借三年後
軍食尤居兩稅先

農父江邊立荷戈無人南畝種嘉禾今年妻子愁飢死
活到明年更奈何

江海波濤日日生山林豺虎復縱橫老夫僻在深村住
恰似春蠶繭裏行

蘆溝曉月圖

蘆溝橋西車馬多山頭白日照青波
蘆亦有江南婦
愁聽金人出塞歌

久雨

新年新雨連殘臘一月渾無一日晴曉起鶯聲都寂寞
寒深柳眼未分明

藏春亭

細聽流鶯宛轉歌對花不飲奈春何日斜醉臥堦前草
不覺沾衣柳絮多

盧琦圭峰集

琦字希韓別號立齋泉之惠安人登至正二年進士第授州錄事遷永春縣尹始至則賑饑饉止橫征減口鹽一百餘引鄰邑盜發適琦巡邑境盜遂見迎拜曰此永春大夫也琦立馬諭以禍福皆投刀槊請自新自是威惠行於境外時兵革四起琦屢敗諸寇永春宴然十六年改調寧德歷官漕司提舉以近臣薦除知平陽州命下而卒世居圭峰

之下故所著曰圭峰集元陳誠中所編明萬厯初

邑人朱一龍三山董應舉序而刻之今觀其詩大

半見薩天錫集中亦間有陳衆仲同寬甫諸作兵

燹之餘收拾采掇不無傳鈔之誤天錫宦遊閩海

遺橐流傳如中秋翫月一篇自叙歷歷可考而後

人漫不簡點使圭峰一集真贗雜陳可慨也若其

寄同年拜珠伸御史及重遊蓬壺等詩為希韓所

作無疑茲特芟其重見他集者采而錄之良吏高

風情詞婉約藹然自見於言外是則圭峰之真而已矣

咨王侍郎寄楔原魯應奉

名門世所仰偉器人初識除書出省垣
匹馬發山驛金臺芳春宴玉署清晝寂
年富經學優事簡宦情適筍班綵雲曙
蓮燭明月夕登岡望庭闈開閣集賓客
鯁生寂無聞良晤何由得髮鬢亦已華
意氣徒自激題詩寄天風渺渺煙樹碧

漁樵共話圖

樵夫初上山漁父纔泊船邂逅即相問生涯兩堪憐我
渴魚可羹爾歸突未煙爾魚莫索價我薪不論錢惟將
薪換魚一笑各欣然

龍江山平遠樓

龍江居人稠市井若城邑陳君作江樓塵雜不相及身
閒千慮遣日駐萬境集羣峙兩岸山一一如拱揖大海
東南流海氣日呼吸長橋亘百丈層壘崇七級微茫認

島嶼曠蕩辨原陞潮聲山外寒嵐氣屋中溼古寺煙鐘
來遙浦漁艇入霜晴鳧鴈浴月白蛟螭泣賓朋事幽討
觴咏屬佳什蹇予簿書煩乃受升斗繫公餘強登眺詩
思轉羞澀江空歲年晚日夕天風急行藏我何心倚闌
還佇立

題陳允中山居卷

山妍雨初暗洞窈雲常暝瑩瑩碧澗流落落青松影遊
咏有高人誅茅臨複嶺開窻翠嵐香展卷白日永興來

即吟詩客至但烹茗抱琴莫出遊蕙帳夜深冷

春江晚渡圖

風微杜若香潮滿江聲寂扁舟古渡前推起篷窗白山
外日未高波底雲先赤隱見杏花邨依稀煙雨隔人間
行路難羨此丹青跡焉得并州刀翦取澄江碧

憂邨氓

世道日紛紜人人自憂切路逢邨老談吞聲重悲噎我
里百餘家家盡磨滅休論富與貧官事何由徹縣帖

昨夜下羈縻成行列鄰里爭遁逃妻兒各分別莫遣一
遭逢皮骨俱碎折朝對狐狸嘯莫為豺虎齧到官縱得
歸囊底分文竭仰視天宇高網維孰提挈但恨身不死
抑鬱腸中熟南州無杜鵑訴下空啼血

元史良吏傳載
希韓為永春尹

有惠政鄰邑仙遊盜發遇之遙拜曰為大夫百姓者何
幸吾邑長用暴毒驅我故至此耳遂請縛其渠以降其
後安溪賊數萬來襲永春衆皆感憤曰使君父母我民
赤子其忍以父母界賊耶因踴躍爭奮大破之觀此詩
知希韓之體
恤斯民切矣

鞦韆

綠窗美人閉深院燕語鶯啼春事半畫闌睡足四無人
空與東君說幽怨綵繩孃孃挂青煙羅襪纖纖翩翠袖
紅妝高出牆頭花繡帶斜飛亭際柳香風蕩漾春誰主
願學飛仙飛不去黃昏溪月浸梨花背立鞦韆悄無語

燭

海棠庭院日西入絳蠟凝香高一尺銀臺照夜春溶溶
金屏繡褥光相射洞房寶扇雙鳳花丫鬟纖手籠絳紗
蘭鐙交暉奪明月玉盃照影傾流霞高堂舞袖沈香暖

歡娛未盡春宵短長風駘蕩落花多野鳥啼春動幽怨

秋蚊

茉莉堂前月華吐飛蚊擾擾晴雷怒深閨小玉焚椒蘭
繡幕穿簾柳花度芙蓉夜臥銀燭滅綠紗如煙罩香雪
潛身飛入羅扇風耳畔營營宵不絕瓊肌一啞雨夢回
玉腕斜批守宮血屋外寒蟬自清素夜夜長吟飲花露
至正己亥夏予遊壺山宿真淨巖即景賦詩奉
簡古道了堂二師

六月翠壺山下客凌晨登山如絕壁支筇徑上真淨巖
頭上青天纔咫尺高僧十載棲巖幽啓扉相見還相畱
欣然坐我斗室底滿室嵐氣生清秋開窻一覽數千里
滄海微茫等杯水客帆來往煙雨中人家遠近林巒裏
平生讀書苦不多時事如此將奈何蠅頭蝸角付一笑
會當結屋山之阿

望湖亭

望湖亭外波蕩蕩漁舟客櫂頻來往好風卷雨黑雲收

十里湖天平似掌長川極浦秋雲清錦帆自信牙樯輕
蘭橈掣動龍蛇影櫂歌驚起鷺鷥盟昔是席上珍今作
宦中客兩載遊帝京雙鬢半垂白三衢非為嬾折腰楓
城聯蔭桐陰色黃金孰鑄子期形白玉空教和氏泣丈
夫氣槩無憚勞對此江山趣自高浩歌長嘯天地窄笑
殺馮唐歎二毛

中元回家拜祭感懷

七月十五月正圓中元遺俗知奉先亂後人家生事薄

遊兵邏卒猶喧闐山鄉路阻無紙錢江邛月落烹細鮮
新魂舊魂百戰死孤兒寡女雙淚連陳生歸來泉石下
獨居一室如磬懸潔膳孝養復何有幽軒灑掃花竹妍
青藜之羹薦香飯翠壺之茗烹清泉二親避地海中渚
顧影百拜心悽然荷衣破碎莫雨急枕書不寐思去年
烽火連天暗鋒鏑遺骸滿野飛烏鳶蘭盆酒果誰復設
若教之鬼啼秋煙連兵構禍今未已疲民重斂何敢言
喜聞王師下閩海廟堂元宰方籌邊桓桓諸將奮忠烈

義氣思欲吞腥羶下方野人日矯首旄頭早落閩中天
人有居鬼有享賣刀買犢耕山田

寄張子震

南浦多芳草東風又落花相思頻入夢見說欲回家
竒字從人問新醅為客賒自慚羈旅者猶滯錦江涯

和林子蒼湖亭晚酌

登臨多野趣未暇問朝簪南國秋聲起西湖暮景涵
江雲連遠樹山雨落寒嵐同是他鄉客相攜看斗南

惠安道中

龍山兵火後百里總蕭疎
官帑需新賦公田索舊租
蓴鱸頻有夢鴻鴈久無書
自笑成何用雲邊是舊廬

昆山客邸

萍水須相識居然子共歡
天高秋月落江近夜潮寒
湖海詩懷壯雲山客夢殘
出門舟欲發猶自倚闌干

遊洞嶺寺

古寺藏煙樹巖扉畫不扃
日高花散影風定竹無聲
稚

子添香火閒僧閱藏經
新詩吟未就獨向殿階行

遊北巖菴

曲徑峰前轉臨行見虎蹤
孤菴萬樹合絕澗一橋通
芳草凝微露靈湫飲綵虹
山僧面壁坐應悟萬緣空

遊吳廷用南莊

公事多餘暇看山到遠邨
雲莊依竹見樵逕過橋分野
水晴春碓巖松晝掩門
所忻花縣近歸路任黃昏

寄同年狀元拜珠伸御史

臚唱乍傳同虎榜繡衣還見上烏臺石頭城下題詩遍
天目山前攬轡迴使節照江秋水立諫書排闥曙雲開
東南赤子瘡痍甚日望分司御史來

希韓至正壬午登第是歲拜住為右

勝第
一人

自高郵買舟還江南至常州值雨寄魯元達

萬里扁舟偶獨還毗陵城下少盤桓天連曠野青山少
雨滿空樓白晝閒旅邸有人垂顧問家書何日寄平安
半生勲業成迂濶猶自窗前把鏡看

汀州道中

七閩窮處古汀州萬壑千巖草樹稠嵐氣滿林晴亦雨
溪聲近驛夜如秋雲間僧舍時聞犬兵後人家盡買牛
但得龔黃為太守邊方從此永無憂

送吳元珍

幾年不翦西窗燭此日相逢如別何冷宦莫嗟鄉國遠
故人今在省臺多閩關把袂雲生樹灤水維舟月滿河
我爾重尋燕薊路鳳城載酒日相過

依韻答歐士中

客舍淒涼生綠蕪，經年祇傍野人居。
尊空每買鄰家酒，巷僻應回長者車。
白鳥夢殘楓樹冷，黃花香老竹籬疎。
相逢且莫談離別，一別如今十載餘。

重遊蓬壺因呈諸公一笑

我來作縣已三載，偏愛毗湖春酒香。
溪上畫橋朝繫馬，雨中茅屋夜連牀。
多情黃鳥短長曲，無數桃花濃淡妝。
欲學淵明歸種柳，不栽桃李滿河陽。

予客莆中同登壺山真淨巖訪古道了堂二師
松扉深入白雲中躡磴捫蘿路可通結社幾人從惠遠
登山何處覓壺公五更客夢茅簷雨六月秋聲木葉風
獨倚闌干望江海故鄉應在海門東

至正己亥六月遊壺山宿真淨巖訪忠門西江

陳公江亭

樹下松扉絕點埃何須海上覓蓬萊十年客鬢塵中改
六月襟懷酒後開雲影不隨飛鳥沒江聲偏逐晚潮來

干戈滿眼風塵暗欲別西山首重回

希韓歷任閩中故多壺山之遊兼有

陶令歸來之感其時天下多故干戈四起薩天錫在閩幕遷于後至元三年與此時情事自不同也

寓平南善應菴述懷

去年過此身猶健今日重來一病翁
亂地風霜如塞上隔江煙火是莆中
孤鴻唳月秋空碧萬葉經霜野樹紅
竹下閉門來客少清談日與老僧同

和林子蒼玄妙寺值雨

兩袖薰風緩轡遊
粵王城下少淹留
客衣半溼松花雨

鶴影先分竹院秋採藥僧歸雲外路吟詩人倚樹間樓
憑君汲取前溪水為洗塵中浩蕩愁

仲秋寓逕江張伯雅席上作

征衫一路拂輕埃袖得嵐光渡水來月色不如今夜好
客懷應為故人開香隨桂子雲間落夢逐潮聲海上迴
醉倚西風賦離別明年何處共銜盃

福清平南道中

輕輿五月歷郊坰萬事都非舊典刑省檄一番新繕甲

金少日人卷二十
卷五十一
民兵十戶半抽丁雨餘野水邛邛白海上煙岑點點青
只合早尋丘壑去年來鬢髮已星星

題南岡上人詩卷

曾見天華落講堂翩然振錫白雲鄉蓋茅絕壁星辰近
採藥深林雨露香獨鶴當窗松影瘦老龍歸洞夕陰涼
相思欲寄新成偈落葉蕭蕭山路長

美人折花

曉綰香雲出戶來凌波微步下瑤階潛身折處香凝指

正面看時影在懷，鷺蹋露珠沾翠袖。
蝶隨春色上金釵，石闌干外莓苔滑。
歸院應須換繡屨。

登大峰山

一逕盤桓上碧峰，桃花巖畔扣仙宮。
微風不動壇邊樹，北斗頻懸石上松。
龍出洞雲浮檻白，雞鳴海日射窗紅。
遊人咫尺青天近，歷歷溪山在眼中。

過平溪橋

立馬橋邊喚渡船，綠楊烟煖碧波懸。
高峰礙日疑天近。

陰壑猶霜覺地偏處處魚鹽開草市家家雞犬類桃源
隔溪茅屋孤門掩重憶揚雄草太玄

山行雜詠二首

過一山坳又一邨小溪流水映柴門桑間少婦自採葉
舍下老翁閒弄孫山霧欲收紅日晏蕨根新洗碧潭渾
停輿暫向石亭坐隱隱樵歌隔水聞

拂拂輕風穀雨初綠楊隄上步紆徐竹林生筍長過母
巢燕撲蟲歸哺雛雨散溪流平岸漲雲開巖樹倚天孤

憑誰喚起王摩詰寫入秋毫作畫圖

題全安莊

野寺尋真幽更幽老僧敬客客來遊
疎鐘幾杵江山暮落鴈一聲天地秋
山鳥有情憐我去燭花濺淚為誰愁
而今惆悵江頭別不識重來有日不

過吳江

興隨流水共悠悠此地蘆花正滿洲
落日片帆千里暮西風長笛數聲秋
衣冠空帶英雄淚湖海難消浩蕩愁

吟罷欲尋沽酒處
傍人遙指隔江樓

縣齋閒坐偶成

庭樹雪初晴
雙雙鳴鵲聲
六花消未盡
猶照葉心明

興化道中

雨過山城野水渾
夕陽黃犢臥籬根
吳塘父老應相語
昨夜南船到海門

泊洗溪驛

篷底淒風過似箭
枕邊急浪響於雷
夢魂曾到桐陰下

夜未三更又却回

草萍驛和薩天錫

林外輕風帽影斜
客衣近染紫山霞
等閒點檢春多少
牆角薔薇幾樹花

錢舜舉木芙蓉


紅妝初映酒盃斜
倚西風轉不堪
霜後池塘秋欲盡
令人惆悵憶江南

題射獵圖

滿目西風塞上塵
五花驄馬轉精神
憑君莫射雙飛鴈
恐有音書寄遠人

元詩選初集卷五十

謹案第一頁前八行庫庫特穆爾舊作擴廓帖木
兒今改 三十四頁前八行拜珠伸舊作拜住
善今改



總校官候補中書臣吳紹濂

校對官編修臣馬啟泰

謄錄監生臣張桴

欽定四庫全書

集部

元詩選初集卷五十一

詳校官候選知縣臣吳甸華



欽定四庫全書薈要卷二萬四百十一

集部

元詩選初集卷五十一
長洲 顧嗣立 編

黃鎮成秋聲集

鎮成字元鎮昭武人篤志力學不嗜榮利築南田
耕舍隱居著書至順間嘗歷覽楚漢名山周流燕

趙齊魯之墟浮海而返登補陀觀日出如丹慷慨
賦詩翛然有蟬蛻塵囂之志部使者屢薦之不就
其後政府奏授江西儒學副提舉命下而已卒年

七十有五集賢院定號曰貞文處士所著秋聲集
十卷新安鄭潛序之謂如太音希聲天籟自鳴抑
亦有所激而鳴其不平者耶今觀南田耕舍及西
城紀事諸詩亦可以知其寄託之有在矣

春雨南田書事

流水三椽舍桑陰五畝田飯香分野碓茶熟候山泉石
榻看雲坐谿窗聽雨眠桃花川上路應有釣魚船

鉛山早行

早起辭林館鄰雞已再鳴
月弦當戶直斗柄插山高
細溼侵藜杖輕寒襲布袍
前趨東日上五色動雲濤

乘涼

借屋依喬木乘涼愜病身
日回山有影風遠竹無塵
除地平施榻攀條側挂巾
應攜龐老宅真作鹿門人

南山紫雲山居五首

一宿南山頂仙凡此地分
河明疑有浪天近更無雲
月色初秋見泉聲徹夜聞
紅塵飛不到甘與鹿為羣

樹老秋仍露山空晚更蟬
雨添春藥水雲溼種瓜田
對榻僧長坐聞鐘客未眠
自應麋鹿性疎散愛林泉

絕壑開闌檻遙峰展畫圖
雪翻僧供鉢雲繞佛香爐
接板橋橫澗連筒水入厨
杖藜行藥去九節得菖蒲

竹露連巖際松風滿坐隅
水春如有節山鳥似相呼
暑雨收崖蜜晴雲斲土酥
月高秋萬宇身世一冰壺

絕境紅塵遠高居白日長
僻宜人不到靜與世相忘
字闊星辰大山虛水石涼
翠屏天外立秋氣晚蒼蒼

題朱澤民畫山水

與客浮湘水琴書共一舟
雲間雙樹曉天外數峰秋
指顧銷塵慮棲遲發櫂謳
未知身是畫明月滿滄洲

東陽道中

出谷蒼煙薄穿林白日斜
岸崩迂客路木落見人家
野碓喧春水山橋枕淺沙
前邨烏柏熟疑是早梅花

春日東行

青郊冉冉散晴暉
芳樹頻聞一鳥啼
山驛水流花落盡

石田雲煖麥抽齊禪房鑿路當巖半釣屋維舟近竹西
行過野橋人語近尋源應到武陵谿

題秋江把釣圖

獨載輕舸過碧川一綸牽動楚江天蘆邊有月還吹笛
柳外無風不繫船留火夜然湘岸竹得魚朝送酒家錢
十年湖海真如畫亦欲狂歌一扣舷

遊麻姑山用蔣師文韻

紫霧龍鸞月裏遊白銀宮殿海中洲麻姑宴罷壇猶在

葛令丹成井獨留
滴雨浮嵐空翠晚
飛花散玉瀑簾秋
誰能共食金光草
來住仙家十二樓

舟過石門梁安峽

書畫船頭載酒迴
滄洲斜日隔風埃
一雙白鳥背人去
無數青山似馬來
天際雨帆梁峽出
水心雲寺石門開
同遊有客如高李
授簡惟慚賦峴臺

送憲幕陳時中分題得平章河

海國猶傳利澤功
滄溟縹緲百蠻通
潮來估客船歸市

月上人家水浸空
析木星辰三島外
樽桑宮殿五雲東
河梁此日重攜手
目送靈槎萬里風

晚晴書事

白鶴樓西晚雨涼
欲晴山氣遠蒼蒼
鴉銜落日歸平楚
鴈背殘霞上越陽
溪崦築茅堪理釣
畬田收術好休糧
秋風有約巢雲去
却擬狂歌學楚狂

平楚越陽郡
城二臺名

臨川青雲亭

平野荒荒雉堞低
一峰闌檻與雲齊
斗牛三尺龍光照

城郭千年鶴爪題
白雨來時江水北
青山盡處夕陽西
古來亦有憑高客
樹影蒼涼繞大隄

題定武蘭亭

繭紙香隨玉匣遺
寶書天上世難知
狼烽幾墮昆明劫
蟬翼猶傳定武碑
曉雨苔花侵擣石
秋山柿葉費臨池
東都已往誰能繼
神物終煩謹護持

鼓山靈源洞

有方巖天風海濤亭喝水巖

方巖峰頭萬丈梯
上方高與白雲齊
青山盡處海門濶

紅日上來天宇低，
喝水無人空宴坐。
磨崖有客謾留題，
飄然欲御長風去。
一笑何煩過虎谿。

辛巳還光邑祖居上井約江少府同到

東井田廬故業非，
十年風雨寸心違。
江湖水濶冥鴻去，
城郭春深老鶴歸。
桑梓盡隨黃壤化，
松楸空望白雲飛。
梅仙此日能相約，
竹杖相攜上翠微。

舟過大茅洋

漲海渾茫寄一桴，
候神東去接方壺。
帆隨雪浪高還下，

島浸冰天有若無，鴈影斜翻西日遠。
潮聲直上晚雲孤，投綸擬學任公子。
掣取封鱣，飲萬夫。

鱣古鯨字

補陀島

一片雲帆駕渺茫，東臨絕島拂扶桑。
九天波浪隨星客，萬壑魚龍覲水王。
日觀遠開溟渤動，雲臺倒浸白花香。
候神海上應相見，為覓安期却老方。

錢塘

雨過高風發屋聲，吳中暑退即寒生。
晴光入眼園林薄

夜氣侵人枕簟輕
寺鐸呼風宵自語
鄰機織月曉猶鳴
江湖處處悲秋客
起束歸裝不待明

贈葉山人

仙巖溪上葉山人
手佩青囊太古文
北極地從林邑下
南條山到蜀江分
尋源屢識蛟龍宅
探穴長隨虎豹羣
更約秋風清霽日
與君高踏萬重雲

用鷺峰師韻送澗泉上人游方十首

天台山上綵虹橋
山下桃花帶露飄
仙客雲霞迷舊路

化人宮殿現層霄穿林夜氣香為蓋冠嶺晨光錦作標
若到上方應駐錫遙聞法鼓動春潮

天台

鴈山鐘磬半空聞雪嶺霞城此地分金塔影浮滄海月
寶臺光繞梵天雲禪機已熟能傳印世網難嬰易解紛
更上孤峰看瀑布願將餘瀝湔妖氛

鴈蕩

潮音海洞石盤陀送子東遊奈別何日上扶桑天不遠
雲連析木地無多水王獻寶開丹穴星使通槎泛白波
見說蓬萊清淺處便從鵬翼起秋河

補陀

身隨衡岳片雲來南極朱陵洞府開八桂山川臨鳥道
九疑風雨溼龍堆使華今日嚴珪幣祖印何年翦草萊
直到無生參學畢逢人遮莫說輪迴

衡岳

廬阜山陽幾勝遊竭來重為虎谿畱千尋瀑布雲霞冷
九派江流日月浮白鹿盤盤高洞曉黃花采采故園秋
東南更有名藍在莫道諸方訊已周

廬山

去禮文殊寶刹開倚空巒岫鬱崔嵬金函奉旨傳香至
白氈圖形載法來心鏡象懸天外月教筵獅吼地中雷

還將拂子閒拈起
更上繙經第一臺
五臺

一上鍾山萬慮消
虛空樓閣翠岩堯
金陵鬱鬱帝王宅
天塹悠悠南北朝
月滿石城秋似水
風高淮浦夜生潮
未應便作乘蘆去
且聽仙人碧玉簫

鍾山

路入西山窈復深
法筵應有聖僧臨
兩峰塔影天垂蓋
千佛林光地布金
牛笛儻逢圓澤語
龍宮還見閻仙吟
空中更上藏雲洞
水樂泠泠奏八音

靈隱

峨眉樓閣現虛空
玉宇高寒上界同
茶鼎夜烹千古雪

花幡晨動九天風雲連太白開中夏日繞重玄宅大雄
師去想無登陟遠祇應飛錫驗神通

峨眉

浮杯東渡海門潮鷲嶺玄關路匪遙十載江湖曾慣歷
五山風月自相招呼猿洞口行雙澗放鶴亭邊入斷橋
直到妙高峰上望曇華天雨滿煙霄

五山

西窻晝雨

三春驚過半靈雨灑窻西鵲腦添爐炷春鳩隔樹啼

夕泛

秋淨山如拭江清一棹橫
挂帆延暮眺趺坐待潮生

谷口

谷口橋邊日未斜
先尋宿處近梅花
分明聽得吹長笛
祇隔紅闌第一家

春日行近山

門外山童埽落霞
問師還只在山家
推窻引客雲邊坐
自扇風爐煮雪花

柯亭

金碧樓臺宅梵王
柯亭無處問中郎
何當截取如椽幹
吹起崑丘紫鳳凰

南田夜雨

四簷春雨夜浪浪
記得吹笙近竹房
三十五年江海夢
又隨歸鴈過瀟湘

南田耕舍二首

跨鶴來尋處士家
迢迢空翠隔煙霞
山童揖客松邊坐
却背春風埽落花

行到長松野水間
吹簫石上不知還
嵐光已重衣裳冷
自扣巖扉月滿山

題麻姑圖有懷蔣師文

曾宿丹霞十二樓
水亭風館不勝秋
故人天上無書到
自展山圖看雪流

梅花

吟屋蕭疎霜後邛
江頭千樹欲黃昏
等閒又被春風覺
添得寒梢月一痕

春夜聽雨有懷

孤客曾聽夜雨眠
一生江海已華顛
吟懷不與春風隔
謾憶簷聲五十年

山家

家住桃花源上邨
編松為屋鹿為羣
匡牀盡日臨門坐
閒看青山起白雲

聞雞

曾催月影倒寒窻
又促征車拂曉霜
湖海故人今白髮

五更孤枕淚浪浪

黃月潭

平生山水最相親
蠟屐長隨野鹿羣
未似月潭雙足健
東南踏遍萬重雲

雲山小景

飛瀑潺潺瀉碧岑
野橋分路入雲深
三椽草屋長松下
應有先生抱膝吟

五月調兵赴綏陽二首

五月農家半未耕更聞田鼠食苗萌轅門昨夜飛書急
十戶三人赴調兵

五月公私乏見儲師徒野掠竟何如自憐無力操戈從
未敢偷安飽飯居

題王元善赴北清江新鴈圖

江南春水拍天齊鴻鴈成行向北飛未必雲山便相隔
秋風還帶夕陽歸

南田耕舍

離離南山田采采山下綠茲晨涼風發秋氣已可掬
美人平生親零落在空谷顏色不可見何由踵高躅
我耕南山田我結南山屋下山交桑麻上山友麋鹿
還肯過鄰家鄰家酒應熟

石橋山

散策南山下逶迤登石橋五涉曲澗水兩山鬱岩堯
黃緣度絕壁攀蘿俯山椒懸瀑瀉層崖冰華垂空飄
盤紆上石磴天梯颭回飈廁足得平地聳身凌丹霄
入谷煙

霞深松竹聲蕭蕭會當發天秘翦此荆榛條結屋棲白
雲覽矚千峰遙土沃既宜耕山深仍可樵因之習天遊
已足遠世囂悠然萬物表我隱誰能招

臘月過里敦田舍

天高北風寒日薄歲云暮衰年畏奔走乃復在途路山
邨投寓舍所歷遇親故具言違別久相問未知處茲晨
喪亂中詎意忽歡聚留客坐西窻呼兒忙治具家釀熟
未翁舊醅鄰所助筍藪雜梅糝火豆連蔬茹慚愧齒牙

疎杯盤宜我，怨雞肥割黃膏。苦勸頻下箸，雜坐同几席。
誰能嗔禮數，翁年當自寬鄙野。得真趣，所願息兵甲。田
里無征賦，借屋傍流泉。從子山中住。

避地椒歷

三月初九日

鄰家急相報，且往椒歷山。登陟如猿猱，合沓同躋攀。遠
近火煙起，指點望城間。椒歷不可住，迫晚登孱顏。夜宿
草樹中，露下山氣寒。

三郎山

初十日

曉度三郎山雲深逕盤濕斜迤下陽坡人牛競來集汲
泉吹野火煮飯分餘汁扶難感藜杖歎倒僅能及行行
不可望危峰倚天立

上鵠 十二日

一家巢上鵠俯瞰萬級田扶攜數百人夜宿荒山巔正
晝雷電飛驟雨奔流泉月黑石磴滑歸路相攀緣後至
且勿迫小立聽潺湲

謝邊 十三日

衝雨來謝邊滑路霑泥塗舊鄰忽相見留我宿山居然
薪燎我衣取酒慰我劬雖有骨肉親各在天一隅感子
勞苦意焉能念崎嶇

同御史鄭彥昭登丹臺韻

晨登鍊丹臺雲磴互盤曲五月居高明曠遠窮望目雨
洗炎埃淨涼風動梧竹遙峰明晚翠近瀨漱寒玉聯鑣
得驄騎杖策偶馳逐詩留紙上雲酒散樽中綠坐久獨
歸遲鳴騶出空谷

予作南田耕舍諸公賦者率擬之於老農噫人各有志同牀而不察世之君子乃欲責人之知己不亦難乎因作寫懷二首以自解云

白日不停馭頽波竟東馳忽忽年歲改念此將安歸我欲驅車行太行路嶮巖我欲駕方舟滄海無津涯豈不顧行邁出門慎所之有田南山下可以供盛筵有廬在中田可以譚詩書上探羲皇際下及商周時賢聖尚淪落微生何足疑懷哉羨門子千載以為期

種田南山下土薄良苗稀稊稗日以長荼蓼塞中畦路
逢荷篠人相顧徒嗟咨我欲芟其蕪但念筋力微終焉
鮮嘉穀何以奉年饑誰令惡草根亦蒙雨露滋豈無力
耕人悠悠興我思

城西紀事

今日稍清適獨出城西邨感時經喪亂風物異郊原林
摧見平陸寺破留頽垣高亭化莽墟華屋成蔬園徘徊
在中路偶聽農老言新苗未入土苗草日已蕃丁男赴

徵調期令集轅門況乃乏牛力苦辛難具論我聞增慘
愴無策拯元元身老不能耕焉敢飫盤飧

遠適

吉日有遠適我行志四方西馳窮河源東望臨扶桑南
通火維外北達冰竈傍勿謂天地濶勿謂歲月長駕馬
積十駕千里追飛黃大鵬發天池搏風起翱翔誰能守
卓櫪不復馳康莊誰能斂羽翮但學檜榆枋大道甚平
夷誰謂阻關梁寄言遠適者日進不可量

桃花巖

小僉山中數塊石上出浮雲幾千尺寒泉飛下絕澗響
老樹倒挂蒼苔壁巨靈擘斷知何年中有古洞藏神仙
蓬萊宮闕浩杳靄世外別有壺中天巉巖磊砢相緣入
雲霧晦冥光景集丹房石室淨無塵虎攫龍挐半空濕
山人舊說桃花巖山高水絕無由探我來正值巖花發
長嘯獨倚春風酣同遊雅士貪幽趣自劓山雲燒筍具
兩山流水一川花依稀似是桃源處世上紛紛吹戰塵

山中道人都聞欲從君住不可得一聲孤鶴唳空雲
吳伯昭紅蓮綠幕圖歌

烏君之山從西來拔地萬仞青崔嵬劃然磅礴下江滸
林麓隱隱棲樓臺上有飛蘿罨罟古喬木下有滄浪萬
頃青如苔紅蓮綽約泛渚淨綠幕縹緲臨湖開雲煙捲
風島嶼沒窻戶洗雨冰霜迴高人自是青雲客日向湖
亭賞山色昔年走馬踏紅塵射殺南山雙白額今日綸
巾羽扇閒獨面清泠飲冰蘂壺箭收投勝負空棊枰罷

局機籌息延陵公子昔稱賢
畫手復見今道玄有聲之
畫宜詩篇為子作詩將畫傳

題墨菊

江南九月秋風涼秋菊采采金
衣黃近時丹丘出新意
却灑淡墨傳秋香青城學士曾
題藻散落人間共傳寶
卷舒造化入毫端回首東籬自
枯槁東陽傳君心好奇
何處得此秋霜枝湖湘衲子遠
相貺筆勢迥與丹丘齊
香英細感玄玉屑老榦拗斷烏
金折不隨粉黛學時妝

自與幽人同志節淵明已逝屈子沈晚香縱有誰知心
感君畫圖三歎息為君長歌楚天碧

李將軍歌

李將軍少年意氣輕浮雲青絲絡馬黃金勒寶劍錯鏤
交龍文十二高樓連廣道千金結客大梁門昨日彎弓
連白羽射殺南山白額虎歸來饗士酒千鍾自向青樓
按歌舞前年起兵從義旗斬將陷陣身如飛上功幕府
久未報有酒不樂當何為

直沽客

直沽客作客江南又江北自從兵甲滿中原道路艱難
來不得今年却趁直沽船黑洋大海波連天順風半月
到閩海只與七州通賣買嗚呼江南江北不可通只有
海船來海中海中多風多賊徒未知來年來得無

悲秋詞

長歎復長歎芙蓉落盡秋水寒庭前百草枯爛死遊子
日暮衣裳單白日悠悠歲將晏江南水深波浪散鴻鴈

不來江水長零落秋雲滿江岸願天吹作凌天風吹開
白霧清暘紅願天化作炎天雨物物昭蘇感天語

從軍行

秋風漠漠寒雲低隴頭野鴈隨雲飛北方健兒長南土
學得南語相嗷咿羽書昨夜到行府下令急點如星馳
明日橫刀出門去回頭不得顧妻兒山城止舍休十日
百姓餽給無飢疲路上逢人寄書歸道好將息無相思
重關夜度月落早五嶺冬戍天寒遲買羊擊豕且為樂

破賊歸去知何時

島夷行

島夷出沒如飛隼右手持刀左持盾大舶輕艘海上行
華人未見心先隕千金重募來殺賊賊退心驕酬不得
爾財吾橐婦吾家省命防城誰敢責

莫徭行

莫徭射生蠻峒谷窄袴短衣雙赤足前年應募作官軍
惡少如雲學裝束千邨一過如蝗落婦滿軍中金滿橐

廌冠擊碎且勿嗔鄰寇不虞吾所託

投贈鄭守光遠三十韻

累洽開皇極分藩重守臣列茅周土舊分竹漢符新師
帥能宣化儀刑最近民隼旗張日月雉閣麗星辰地紀
逾荒服天光照遠人選材歸德器分命聳朝紳一代文
章伯羣心怙恃親祖風光靄靄家學早振振聽履曾馳
譽工書固絕倫九苞騰鸞鷲千里驟騏驎仗引陪供奉
官聯屬選掄河源通析木星象擁勾陳暫輟中朝紱來

紆外府輪土風連太末山節聳全閩佐乘臨漳浦褰帷
入劔津近河能借潤依燭解光鄰化雨蘇民望祥風洗
瘴塵袴襦歌已決刀劔俗咸悛山郭惟樵郡封鄰接海
濱地偏田少沃土狹戶多貧捐瘠饑瘥并流亡寇役頻
震凌思大廈枯枿徙洪鈞幸借循良牧咸依撫字仁晝
長簾似水更靜月如銀赤社分南服清都拱北辰報看
三月政和覩萬家春少日探經笥頽年媿席珍雨畦仍
把耒風艇自收緡喜見瘳民瘼無由傳吏循祇須成德

化濡筆頌堅珉

胡天游傲軒吟稿

天游名乘龍以字行別號松竹主人岳之平江人
當元季之亂隱居不出邑人艾科晉卿為之傳曰
天游有俊逸才七歲短吟具作者風力名籍籍一
世視伯生子昂不輸一籌也負高氣孤立峻視曾
不一起取斗祿自污扼腕當時俯仰太古鳴之歌
什有沈湘蹈海之風今其集中荆軻館與醉歌等
篇可想見也壬辰夏荏苒符蠶起所過皆墟獨天游

室巋然煨燼中因自號曰傲軒氏性少許可獨雅
善余牧山每泛航清溪弄月佳夜放歌岸幘謔聲
如雷各持盛氣不下牧山贈云能酒能詩只兩翁
晚歲益自矜其徘徊亂世以緬想太平之心卒泯
然不白也因作述志賦以寓長飲之恨云兵燹之
餘篇什散落存者僅什之三四曰傲軒吟彙明弘
治間其七世裔孫榮昌令相刻之嘉靖初八世孫
大器復編次重刻豫章羅慄謂傲軒詩豪邁卓絕

與虞趙諸公相出入而出處大節過之胡氏文獻
世家宜其能保守若是然則詩文之傳世與否豈
真有幸不幸哉

遊法興寺

七歲作

山色搖光入袖涼
松陰十丈印迴廊
老僧讀罷楞嚴咒
一殿神風栢子香

春詞和韻七首

綠窗紅燭製春衣
宮樣花紗要入時
玉手怕裁雙鳳破

金史四
卷五十一
并刀欲下更遲遲

日射珠簾試曉晴
隙光斜上寶釵明
碧紗窻下無消息
閒數吳蠶幾箇生

自尋蜀紙寫吳歌
小字斜行未省多
嬌懶却嫌春戰冷
手拈牙筆倩人呵

暖風深巷賣花天
爭買繁華裊鬢邊
揀得一枝紅躑躅
隔簾拋與沈郎錢

雙鷓不惜浣泥沙
閒逐吳姬鬪草芽
贏得阿嬌金半臂

背人含笑入桃花

貪逐春風趁伴遊
不知明月上梢頭
兒夫若問歸遲意
幾度穿花避紫驕

昨日江頭看綠楊
歸來學得兩眉長
低聲更向蕭郎問
又恐眉長不稱妝

橫橋阻水

浮江積雨水連天
楊柳依依一釣船
白髮篙師多意氣
向人先索渡江錢

冬暖

冬令偷春多得暖
灞橋無思可吟詩
江梅一樹都開遍
不問南枝與北枝

壬辰歲草昧蠶起比屋皆煨燼
區室幸存自扁
曰傲軒因題二首

百屋堆錢等夢回
春風多誤燕歸來
如何四壁都無物
獨向人間傲劫灰

獨酌何須問主賓
興來魚鳥亦相親
蒼松翠竹真佳客

明月清風是故人

男從軍三首

十五束髮去從軍背劍腰刀別弟昆
男兒不灑臨歧淚感篋數聲吹出門

雨沐風餐夜枕戈東征未了北防河
當時只道從軍樂誰道從軍苦更多

自古男兒要自強腰間金印有時黃
時來不用龍泉劍手搏樓蘭獻廟堂

女從軍三首

二八女兒紅繡靴
朝朝馬上畫雙蛾
采蓮曲調都忘却
學得軍中唱凱歌

從軍裝束效男兒
短製衣衫淡掃眉
衆裏倩人扶上馬
嬌羞不似在家時

柳營清曉促征期
女伴相呼看祭旗
壯士指僵霜氣重
將軍莫訝鼓聲催

贈余公圖畫樓二首

一幅生綃天盡頭水光山色上簾鈎似將崔白千年軸
掛在元龍百尺樓霜葉埽鴉描落照溼雲和鴈捲清秋
紛紛紙上爭妍醜還識無為妙處求

高人有眼看山川不費從來買畫錢萬古丹青垂宇宙
百川樓觀倚風煙人行榭葉林邊路鳥沒蘆花影裏天
我欲與公添一筆寒灘蓑笠釣魚船

燈花給韻

寸燼能偷造化權花開花落自黃昏豈憑根本栽培力

暫借膏油養育恩，隔幔乍疑籠日幄。
展屏聊當避風幙，彫零滿案無人問。
付與青娥淬鬢痕。

雙頭蓮

一枝瑤柄倚風清，兩面紅妝鬪日明。
張孔斷魂埋玉井，尹邢香魄寄金莖。
雙鸞俯鏡東西照，百子分房向背榮。
若使此花還解語，好將蘭臭與誰平。

牡丹花

相逢盡道看花歸，慙愧尋芳獨後時。
北海已傾新釀酒，

東風猶鎖半開枝
掃空紅紫真無敵
看到雲仍未可知
但願倚闌人不老
為公長賦謫仙詩

寓中水樓秋夕

殘暑崢嶸入夜平
羈懷牢落傍秋生
斷雲推月弔孤影
高瀨挾風來遠聲
山店辟蘊松火細
水樓歌枕葛衣清
餘年飽食慚疎放
回首南州欲用兵

寄內兄余牧山

少年親故盡豪英
回首家山一愴情
桑梓連雲俱寂莫

松筠鬪雪獨崢嶸
生憎赤幘何時白
須信黃河有日清
珍重加餐莫輕出
共畱老眼看昇平

遣悶

昏昏如醉復如癡
半榻殘書兩鬢絲
世故擾攘思樂日
莫年艱苦憶兒時
對人言語惟稱好
徇俗文章懶出奇
斗酒十千無覓處
悶來消遣只憑詩

慶李千戶納室

轅門佳氣曉氤氳
感粟筵開酒半醺
鸞扇低回人似玉

虎牙顛倒從如雲花開穠李春猶小帳掩流蘇夜正分
從此談兵應有助木蘭元是女將軍

憶孟兄季弟

兄弟相看各一方別來俱各鬢成霜江山千里猶比屋
風雨幾番能對牀海燕年深常作客塞鴻天遠不成行
擎杯莫負黃花酒來看南塘萬竹長

譏諷黃蘭谷

雨花風絮兩飄颻興味都非舊寂寥白足懶穿雲外屨

翠眉低按月中簫重拈曉鏡添新髮旋試春衫減舊腰
金鎖玉函千載恨爭如雲雨自朝朝

送姪胡文學修江館

我祖文章伯餘光耿未休聖朝崇學校猶子重箕裘
簡三生債舉比幾度秋登高還小魯觀禮復從周琴為
知音鼓珠寧暗室投小奚藤作笈長鋏蒯為緌細柳牽
征袂飛花餞去舟嗟予倚市拙壯子異鄉遊白酒春風
席紅燈夜雨樓生徒交授受賓主迭賡酬章甫儀刑重

湯盤德業修多能宜下問博學更旁求勿謂青氈冷毋
貽素食羞句休吟首荷交重擇薰蕕忽忽山川異行行
歲月道竹林難共醉江樹攪離愁幕阜山前屋修江月
上鉤白雲飛暫遠莫惜重回頭

和禽言

婆餅焦

婆餅焦新婦腰鎌孫荷樵原頭麥熟空滿壟丈夫盡赴
征西徭嗚呼土鐺敲火淚如雨婆餅不焦心自苦

歸去樂

歸去樂蜀道崔嵬天一角青泥百折費躋攀
灑灑翻空波浪惡嗚呼朝避長蛇夕猛虎干戈滿眼歸何所

暴雨

時聞花馬平章
領兵收附蘄水

層雲生遙岑倏忽騰萬馬回飈振高樹少女弄嬌姘蒼
茫乾坤合慘淡精靈下天明亦韜光母乃龍戰野須臾
萬里霖砰湃動簷瓦端如挽天河千斛罄一瀉潢流走
街衢陋室漂盞聳疾雷無時休壯士為瘖啞書生掩卷

坐頗媿漂麥者坐憂滔天來浩浩失華廈吁嗟造化力
妙手誰能假陰氣劃開除萬象了如畫江山若再造社
鬼爭自詫天公亦何知龍駕正魚雅川源日流血草木
染腥赭為謝滂沱功一洗氣瀟灑

觀蓮

清池瑩人心俯見荷葉背南塘非不佳無此青錢蓋沈
沈古鏡淨濯濯明妝對涼風似畱人幽賞心獨會天公
亦解事一雨不破塊小呼巫陽雲浣此傾國態高盤捧

跳珠錯落無小大恍疑逢二妃
迎笑爭解佩低昂巧簸
弄明月聚還碎馮夷不相容
轉盼何所在人生總虛幻
佇立增歎嘒聊將一餉間
了我看花債濂翁不我待誰
復同此愛長嘯歸去來餘芳
滿襟帶

夏晝睡起一涼快甚

炎歊困亭午推枕目猶眩
簷光射茗椀高壁走驚電
開窻山鳥度倚杖松陰轉
涼風惠然來林影一時亂
徘徊入懷袖顛倒弄書卷
披襟領嘉貺頓爾埽煩倦
迺知封

姨功百倍班女扇無由均此施獨享醜有面王師正南
征荷戟汗如濺

擬賦荆軻館

咸陽宮中頭白烏燕丹掩面聲呱呱函關得免豈天意
禍福倚伏如樗蒲含羞忍恥丈夫事一朝之忿非良圖
黃金未甯求郭隗白刃顧乃希專諸爾軻見之真不恨
樊也投首尤無辜悲歌易水豎毛髮曾次似欲無西都
男兒臨事貴敏速胡乃把袖終踟躕鴻毛性命效一擲

造物不肖成梟盧悲哉秦人信狼虎事勢固與齊桓殊
赤刀應有或僥倖矧可生致編其鬚武陽乳臭不足俱
旁觀駭汗一計無長虹萬丈空貫日恨血竟自灑他裾
全燕席捲果誰過古今罪狀何紛如子雲弄筆不少惜
嗟子要亦非庸夫悲風蕭蕭寒日孤空山廢館荒平蕪
雄姿勁氣不可見仰天椎缶呼嗚嗚

黃陵廟

黃陵祠邊春草齊黃陵廟下春波肥鷓鴣飛飛宮樹綠

日落未落湘雲低祠中帝子重華妃明妝窈窕芙蓉衣
哀絃五十淚如雨此恨只有江山知飛龍之車無定棲
乘風倏忽蒼梧西吹簫酌酒心自苦雲屏霞帳歸何時
茜裙嬌小誰家兒未識人間生別離輕舟相呼採蓮女
來看祠前斑竹枝

途遇大風

客子南遊日欲落觀溪橋頭風色惡砲車雲外天為昏
走石翻江吹倒人橋頭翁媪邀我宿呼酒張燈傍童僕

夜深撫榻不成眠
瑟瑟餘威振茅屋
明朝風定天宇白
一笑促裝三歎息
邇來平地多風波
不獨江頭阻風客

石牛寨

癡牛偃蹇不服箱
天風吹落千仞岡
明河在望歸不得
化作山頭一拳石
皮毛剝落封苔錢
千古萬古眠雲煙
嗚呼安得秦鞭起
殼棘短衣歸種汶
陽田

題幼安濯足圖

山東豪俊何紛紛
飄然乘風呼不聞
餘生亦足老遼海

避世豈必如秦民歸來問舊半零落乾坤割據潛悲辛
青山不改漢家色焉知不有芒碭雲摩挲兩足共世走
將來濯彼滄浪濱眼中馳驅何足道汗脚三寸曹丕塵
黃金瓦礫少年事况甬斗祿污吾身平生子魚今廼爾
尚恨此耳無由新峩峩卓帽千年真安得喚起圖中人
我當再拜公徹洗分我半席長相親

寓館食壘戲主人

蕨芽成拳筍作竿園松臥壘春告闌寸心生意老猶壯

鬱鬱競長青琅玕筠籃擷翠風露溼瓦缶釀碧虬龍蟠
開緘曉試膳夫手寸斷日送先生盤堆金疊玉光璀璨
未許首荷誇闌干鏗鏘拒齒發鈞奏甘脆適口回儒酸
填胃一洗鮭鱻惡頓覺肝膽生清寒朱門淳熬腐腸藥
何異鳩毒生宴安齏鹽送老本吾分一飽已拚如窮韓
幸無羸角蹂吾圃祇有蔬糲同盤桓未知餘生消幾瓮
俯仰日月雙跳丸明當更作冰壺傳大笑出門天地寬

楊花吟

吳江春水拍天涯江上風吹楊柳花花飛滿空無處所
隨風直渡吳江水渡水隨風太有情紫花惹草恣輕盈
狂如舞蝶穿花徑細逐流鶯度綺城綺城樓閣連天際
楊花飛入千門去飛去飛來稍覺多紛紛如雪奈君何
珠簾繡箔深深見舞榭妝樓處處過樓中美人春睡起
愁見楊花思蕩子蕩子飄零去不歸楊花歲歲點春衣
夢魂不識天涯路願作楊花片片飛

田家吟

邨南邨北鳴鷓黃
舍東舍西開野棠
坡晴漸放桑眼綠
水暖忽報秧牙長
老翁躬耕催早起
女績男舂婦炊黍
犢兒狂走未勝犁
蠶蟻半生猶戀紙
一春莫笑田家苦
苦樂原來兩相補
君不見踏歌槌鼓肉如山
昨日原頭祭田祖

無牛歎

荒疇萬頃連陂陀
躬耕無牛將奈何
老翁倭倭挾良耜
婦子竝肩如橐駝
肩頰骨怠汗淹肘
竟日勞勞不終畝

夜歸草屋酸吟嘶祇有飢腸作牛乳却憶向來全盛年
萬牛蔽野無閒田干戈瀕洞一掃盡穀棘就死誰能憐
桃林荒塘春草綠根底紛紛何有犢老翁無力待昇平
卧看牽牛向天哭

無筆歎

宣城鼠鬚不可索越南雞毛不可得山中老穎飛上天
九館癡髯化為石晴窻無復禿千枝曉夢有時來五色
一庭老葉掃西風袖手空堦看蝸迹

無書歎

六經既降諸子出後代枝葉何其多眼中萬卷忽如掃
無乃天意憎繁苛陳言故紙本糟粕吾道耿耿終難磨
劫灰不赭孝先笥畫卧坦腹時摩挲

故人別

故人別新人歸大車小車當路衢路傍把酒相迎送盡
道新人貌更殊故人含笑催上道回頭却向新人笑黃
金不鑄玉郎心送故迎新何日了故人一去無回期新

人還著故人衣玉郎遶牀看畫看恰似故人初到時

給四江韻賦海棠

街西街東鼓逢逢書生閉門續蘭缸有美一人嬌不關

夜稱唐妃領羣媿敲門索我南園百尺之飛幢恍然失
之神為懽遶屋如聞足音是有花嫣然來錦江烟如真
珠滴春缸又如錦旆搖長杠朱脣半起調新腔酩顏睡
足琉璃窻天然富貴真無雙一笑未了千花降麤桃俗
李徒紛麗正須林下拜老龐惜哉胡不居空窻傾城倚

金
庚
日
月
二
一
卷
五
十
一
市衆所矐世人共辯珉與珏平章比擬言何啗陋儒抱
恨駭且憊乃以鼻孔求他邦我來咨嗟久降躩對花壓
酒如流淙玉壺錦瑟聲鏘鏘興酣弄筆鼎可扛賞音一
洗陵翁眈詩成絕倒付同調為我金石相舂撞

醉歌行

醉中豪氣如長虹走上高樓叫天公問天開闢今幾年
有此日月何因緣月者陰之魄日者陽之精陰陽果何
物產此團團形一如白玉盤一似黃金鉦得非冶鑄出

無乃磨琢成茫茫太古初二氣才胚胎金鳥從何出玉
兔從何來扶桑誰人種桂樹何年栽東升何所自西沒
從何遊胡為天地間犇走不暫休但見朝朝莫莫無定
輒但見波波汲汲如犇郵催得黃童變白髮催得華屋
成荒坵催得秦王漢楚忽抔土催得黃河碧海無纖流
我有如澠酒勸天飲一石願天垂長繩繫此烏兔翼一
懸天之南一挂天之北安然不動照萬國無冬無夏無
旦夕百年三萬六千作一刻盡使世人老不得

送李德仁任祁陽和平巡檢

錦襜窄袖青蒙茸，千金駿馬飛如龍。
零陵侯使催上馬，別酒一笑千觴空。
流星白羽新月弓，氣如秋旻吐晴虹。
挂弓插箭出門去，白面已作嗔人紅。
傍人借問將軍誰，乃祖向來猿臂公。
此行為問向何許，永州之野浯溪東。
浯溪有寨圍千峰，將軍雄飛鎮其中。
從來文事有武備，欲與利器加磨礮。
往歲絃歌動隣邑，三年化雨沾頑童。
東安父老舊相識，但怪章甫成軍容。
曾聞零陵古佳縣，

山川清曠無邊烽寨前花開春酒熟細柳夾道清濛濛
胡牀夜琴山月午曉騎突出蠻煙濃鳴絃忽作餓鷓叫
馬頭迸落雙飛鴻健兒提酒酌大斗短角細吹梅花笛
封疆無虞王事少此樂孰與將軍同君不見壺頭六月
火雲熱大將鞅掌親從戎將軍官閒貴憂國猛谷正賴
懷柔功方今天子重邊徼選擢勇銳無卑崇男兒努力
樹明德談笑自可求殊封長風吹吹送枯蓬行塵目斷
心無窮他年得意馬蹏疾錦衣歸拜明光宮

聞李帥逐寇復州治

西南佳氣清如水一騎星馳傳好語隴西將軍天下奇
夜半殺賊收城池我城周遭闖賊壘將軍飛入儲胥裏
城中妖血渺長衢帳底渠魁睡猶美將軍掩襲信有功
人物自是南州雄惜哉士卒多苦暴弱肉強食鷓鴣同
君不見往昔經過清我野老稚逢之無脫者至今婦女
墮戎行閭里蕭條泣鰥寡嗚呼賊退將軍留老夫憂虞
猶未休





元詩選初集卷五十一



總校官候補中書臣吳紹潔

校對官編修臣馬啟泰

謄錄監生臣張桴